

Utamakan bantuan lestari, jangka panjang

Sektor kritikal dan perniagaan yang terkesan teruk akibat pandemik COVID-19 perlu mendapat tumpuan khusus dalam Belanjawan 2021 yang bakal dibentangkan Menteri Kewangan, Tengku Datuk Seri Zafrul Tengku Abdul Aziz, pada 6 November ini.

Secara umum, tahap keprihatinan kerajaan terhadap golongan terjejas akibat wabak COVID-19 wajar diberi pujian, namun rekod baik itu mesti di-teruskan lagi pada pasca Belanjawan 2021.

Belanjawan kali ini mungkin berbeza dengan yang sebelumnya. Ini kerana banyak sektor di negara ini menghadapi kesukaran apabila musibah COVID-19 melanda dunia.

Rakyat berpendapatan rendah (B40) dan berpendapatan sederhana (M40) serta peniaga kecil antara golongan yang memerlukan bantuan khusus secara bersasar kali ini.

Bantuan berterusan ini perlu diberikan supaya kuasa membeli dalam kangan rakyat tidak merosot dan ekonomi domestik dapat terus bergerak.

Antara langkah boleh dilakukan ialah pengurangan harga barang keperluan harian dan cukai pendapatan individu. Kerajaan boleh berbincang dengan pemilik pasar raya besar bagi menurunkan harga barang basah un-



tuk membantu meringankan beban rakyat.

Sekiranya harga barangan seperti ayam, ikan, bawang import, sayur-sayuran dapat dikurangkan sebanyak 20 peratus, usaha ini sedikit sebanyak dapat menjimatkan wang rakyat.

Andainya mendapat maklum balas positif daripada syarikat pasar raya besar mengenai perkara ini, kerajaan boleh mendapatkan kerjasama mereka untuk menurunkan harga barang.

Sekarang adalah masa yang tepat un-

tuk membantu mengurangkan beban rakyat terutama apabila berdepan dengan kesan wabak COVID-19.

Pada masa sama, penurunan cukai pendapatan individu sebanyak dua hingga tiga peratus pula akan menggalakkan aliran tunai seterusnya merancakkan ekonomi domestik.

Penurunan ini bukan untuk setahun, tetapi mungkin boleh dimulakan dengan percukaian untuk tempoh Jun hingga Disember tahun ini.

Pendapatan negara akan sedikit ber-

kurangan, tetapi langkah ini akan membolehkan rakyat mempunyai duit lebih untuk berbelanja dan cara ini juga mampu menaikkan ekonomi tempatan.

Selain bantuan kewangan, mekanisme yang lestari diperlukan dalam usaha memastikan ekonomi negara terus mampan.

Sektor lain seperti pelancongan, kesihatan dan pendidikan misalnya memerlukan 'tangan' yang mempunyai ketahanan dalam menghadapi ketutan ekonomi.

Sebagai contoh, dalam sektor pendidikan, sekiranya membabitkan infrastruktur, perkara itu perlu diberi keutamaan supaya peruntukan yang mencukupi disalurkan untuk mendanai segalah kemudahan bagi menjayakan pengajaran dan pembelajaran maya di institusi pendidikan kerajaan.

Kemudahan ini bukan hanya boleh digunakan ketika negara menghadapi kecemasan umpama wabak penyakit berjangkit seperti COVID-19, tetapi berupaya dimanfaatkan sepanjang masa pada masa akan datang.

Dana yang diperuntukkan haruslah bersifat berterusan dan boleh dioptimumkan sepenuhnya supaya kemudahan itu boleh terus digunakan dalam jangka masa panjang.

Penulis adalah Dekan Sekolah Perniagaan dan Ekonomi, Universiti Putra Malaysia (UPM)



**Prof Dr
Azali
Mohamed**